

CONVENIO DE COLABORACIÓN ENTRE A AXENCIA TURISMO DE GALICIA E A ENTIDADE ULISES PROYECT EVENTOS SL PARA A CELEBRACIÓN DO FESTIVAL “O MARISQUIÑO XVI” .

Santiago de Compostela, 27 de xullo de 2016

REUNIDOS

De unha parte, D^a María Nava Castro Domínguez, directora da Axencia Turismo de Galicia, en virtude do nomeamento polo Decreto 34/2013 do 21 de febreiro e conforme as facultades que lle confire o artigo 5 do Decreto 196/2012, do 27 de setembro polo que se crea a Axencia de Turismo de Galicia e se aproban os seus estatutos que desconcentra na persoa titular da Dirección da Axencia a competencia para subscribir convenios de colaboración no seu respectivo ámbito competencial.

De outra parte, D. ----- con DNI 36126528Z, en calidade de administrador, en nome e representación da entidade Ulises Project Eventos SL con NIF B27773324 e domicilio en Avda. Castrelos, 29-2-D, 36210, en Vigo, Pontevedra.

Interveñen en función dos seus respectivos cargos en exercicio das facultades que, para convir en nome das entidades que representan teñen conferidas

EXPOÑEN

Que a entidade Ulises Project Eventos S.L. é a entidade encargada de celebrar o festival “O Marisquiño”, na cidade de Vigo. Este evento, situado no paseo marítimo de Vigo xunto ao tradicional “mercado de la Piedra”, aúna a realización de campionatos en distintas disciplinas deportivas así como exhibicións e concertos, sendo un dos puntos máis activos do turismo.

Cada ano, o crecemento sostible do Festival obriga a ir ampliando espazos e reorganizando a implantación das actividades e servizos. En 2016, a XVI edición de “O Marisquiño” ocupará máis de 105.000 m² e ampliarase á Zona Franca, Estación Marítima e Plaza da Autoridade Portuaria, integrándose todavía máis se cabe na propia cidade.

Os deportes de acción son cada día máis atractivos e por elo a asistencia de público e participantes na pasada edición foi de uns 120.000 visitantes.

Que a Axencia Turismo de Galicia , en virtude do disposto no artigo 9º do Decreto 196/2012, do 27 de setembro polo que se crea a Axencia de Turismo de Galicia, é o órgano da Xunta de Galicia ao que lle corresponde o exercicio, entre outras, das competencias en materia de fomento e competitividade do turismo.

Que no exercicio das súas funcións, a este órgano correspóndelle executar as medidas definidas para a promoción e fomento do sector turístico de Galicia, levar a cabo plans e programas de acción e colaborar no desenvolvemento de actuacións que lle permitan acadar os seus obxectivos.

Ulises Project Eventos S.L. é a única entidade que organiza o festival “O Marisquiño”.

Dada a converxencia de ámbitos de actuación e o mutuo interese en xuntar esforzos na consecución duns fins que son comúns, as partes asinantes, en virtude da representación coa que interveñen, acordan a subscripción do presente convenio, de acordo coas seguintes

CLÁUSULAS

Primeira.- Obxecto do convenio

Constitúe o obxecto deste convenio o establecemento das condicións para a colaboración técnica e económica entre a Axencia Turismo de Galicia e a entidade Ulises Project Eventos S.L. para a celebración do festival “O Marisquiño XVI” que terá os días 12, 13 e 14 de agosto de 2016 no Porto de Vigo coa seguinte programación:

Campionato internacional de Skateboard

Coa inclusión dentro da World Cup Skateboarding, Vigo convértese nos días do festival no foco internacional desta disciplina que congrega a milleiros de seguidores e que concentra nun mesmo lugar aos mellores do mundo do skate.

Campionato internacional de BMX

Cada ano esta modalidade conta coa participación de máis pilotos internacionais e un maior nivel nun novo circuito cun espectacular “wallride” que será escenario perfecto para a celebración do campionato do ano en Europa.

FMB Worl Tour Dirt Jump

O Marisquiño novamente formará parte da Copa do Mundo de Dirt Jump na categoría Silver, convocando a un 80% de deportistas doutros países.

Campeonato BMX Flat Jam

No que como todos os anos asistirán varios campións do mundo.

Campionato internacional de descenso urbano en mountain bike.

Esta competición logra inegrar a toda a cidade. Esta proba é a máis esperada e seguida polos medios pola súa orixinalidade e a complexidade do seu trazado urbano.

Exhibicións de Freestyle Motocross

Nesta edición os saltos permitirán aos pilotos voar a distancias superiores a 40 metros de largo acadando alturas superiores aos 11 metros. É un dos eventos con maior presenza de participantes.

Campionato internacional de Flatland

Esta disciplina está a un paso de incluírse como parte das competicións oficiais dentro dos X-Games. Conta con participantes de decenas de puntos da xeografía mundial.

Campionato Endurance Graunner Cup

A gran novidade desta edición será a invasión da Ría de Vigo por embarcacións de gran cilindrada que alcanzarán velocidades superiores aos 50 nós.

Campionato internacional de Break Dance.

Estas actuacións complementaranse con elaboración de graffitis e celebracións de concertos musicais, cambiando estes últimos a súa localización á Praza do Rei, respecto ás edicións anteriores.

Segunda.- Orzamento e financiamento

O orzamento estimado para a realización das actuacións previstas neste convenio ascende a 20.000.-€ (IVE excluído), de acordo co seguinte detalle:

CONCEPTO	IMPORTE
AMBULANCIAS	3.000€
SEGURIDADE	5.000€
HOTEIS	5.000€
PRODUCCIÓN ESTRUTURAS	2.000€
MERCHANDISING E PULSEIRAS	2.000€
SANITARIOS QUÍMICOS	3.000€
TOTAL	20.000€

Deste orzamento, a Axencia Turismo de Galicia financiará a contía de vinte mil euros (20.000.-€). A aportación que fai a Axencia Turismo de Galicia para posibilitar a realización das actuacións só cubrirá o custo de realización da actividade sen que Ulises Project Eventos S.L. obteña beneficio ou lucro industrial algún con dita achega.

A Axencia Turismo de Galicia procederá ao pagamento dos gastos correspondentes con cargo á aplicación orzamentaria 04.A2.761A.640.0 "Promoción e difusión do turismo", proxecto 2013 00004, dos orzamentos xerais da Comunidade Autónoma Galega para o ano 2016, a favor de Ulises Project Eventos S.L. unha vez que esta entidade achegue as correspondentes facturas xustificativas dos gastos efectuados xunto coas transferencias bancarias ou outra documentación acreditativa do seu pago así como unha memoria explicativa da actividade realizada que acredite o cumprimento do obxecto do convenio e as certificacións de estar ao corrente das súas obrigas tributarias e sociais e de non ter débedas pendentes por ningún concepto coa Xunta de Galicia.

Terceira. Compromisos das partes

Ulises Project Eventos S.L. queda obrigada á celebración das referidas actuacións, e a realizar tódalas actividades precisas para que as actuacións do convenio de colaboración se desenvolvan correctamente.

Comprometéndose a:

- Entregar á Axencia Turismo de Galicia unha memoria das actividades realizadas.
- Executar o orzamento por importe de 20.000 -€
- Facer constar a cooperación da Axencia Turismo de Galicia en toda a información que se difunda sobre as actuacións, tanto nos medios de comunicación como no material informativo que se puidera distribuír.
- Promocionar a “Marca Galicia” nas actuacións obxecto do presente convenio de colaboración. Nos folletos e outras publicacións deberán incluír na contraportada a marca turística, seguindo as indicacións do manual de uso. Para a aplicación correcta da marca, deberán descargar da páxina www.turgalicia.es/marca01s os arquivos informáticos cos elementos gráficos en calidade e formatos axeitados así como as condicións de uso.

Achegar a información que lle sexa requirida pola Intervención Xeral da Comunidade Autónoma, o Consello de Contas e o Tribunal de Contas no exercicio das súas funcións de e control do destino do investimento.

Presentar, con anterioridade á sinatura do convenio, as certificacións de estar ao corrente das súas obrigas tributarias e sociais e de non ter débedas pendentes por ningún concepto coa Xunta de Galicia.

Cuarta.- Resultados conxuntos

O diverso material promocional elaborado en desenvolvemento das actuacións previstas neste convenio de colaboración, será de uso e titularidade común por ambas partes asinantes.

Calquera modificación dos resultados deberá ser autorizada por ambas partes, non obstante a Axencia Turismo de Galicia, no cumprimento dos seus fins institucionais, poderá utilizar libre e gratuitamente os traballos de campo, datos de todo tipo, resultados, análises, informes e conclusións que se deriven das actuacións obxecto do convenio. En todo caso,

nas accións de difusión de datos e informes obtidos pola execución destas accións farase sempre referencia ao presente convenio.

Quinta.- Comisión de seguimento

Para o desenvolvemento e bo fin deste convenio de colaboración constituirase unha comisión paritaria que velará polo cumprimento das obrigas das partes e adoptará cantas medidas e especificacións técnicas sexan precisas de cara a garantir a boa execución do convenio.

A súa actuación axustarase ao establecido na Lei 30/1992, de 26 de novembro, de réxime xurídico das administracións públicas e do procedemento administrativo común e na Lei 16/2010, de 17 decembro, de organización e funcionamento da administración xeral e do sector público autonómico de Galicia.

Sexta.- Réxime xurídico

O convenio ten natureza administrativa e queda fóra do ámbito de aplicación da Lexislación de Contratos das Administracións Públicas, segundo o Real Decreto Lexislativo 3/2011, de 14 de novembro polo que se aproba o Texto Refundido da Lei de Contratos do Sector Público (TRLCSP), que os exclúe expresamente no apartado d) do parágrafo primeiro do artigo 4.

Este convenio rexerase pola Lei 30/1992, do 26 de novembro, do Réxime Xurídico das Administracións Públicas e do Procedemento Administrativo Común, pola demais normas en dereito administrativo aplicables ou, no seu defecto, polas derivadas do dereito privado.

A subscrición do presente convenio non implicará relación laboral, contractual ou de calquera outro tipo entre os profesionais que desenvolvan as actividades e a Axencia Turismo de Galicia, de tal xeito que non se lle poderá esixir responsabilidade algunha directa nin subsidiariamente polos actos ou feitos acaecidos no desenvolvemento do mesmo.

As cuestións litixiosas xurdidas na aplicación do presente convenio, e non solventadas na vía administrativa, serán resoltas pola xurisdicción contencioso-administrativa.

Sétima.- Xustificación e pagamento

1º.- A achega da Axencia Turismo de Galicia, de 20.000.-€, será librada previa presentación da xustificación da execución das actuacións desenvolvidas para o que se deberá presentar a seguinte documentación:

- Memoria explicativa da actividade realizada e acreditación do cumprimento do obxecto do convenio.
- Facturas xustificativas dos gastos efectuados xunto coas transferencias bancarias ou outra documentación acreditativa do seu pago.
- Certificacións de estar ao corrente das súas obrigas tributarias e da seguridade social e de non ter pendente débedas por ningún concepto coa Xunta de Galicia.

A Axencia Turismo de Galicia resérvase o dereito a solicitar toda a documentación que considere precisa en relación coa xustificación do convenio.

2º.- O prazo para xustificar por parte de Ulises Project Eventos S.L. é o 15 de outubro de 2016.

3º.- De non xustificarse a cantidade total, a liquidación de obrigas realizarase mediante prorrateo segundo os gastos efectivamente realizados de xeito que só se financie o custo real da actividade, sempre e cando se acade o obxecto deste convenio de colaboración

Oitava.- Causas de resolución

Serán causas de resolución deste convenio:

- O incumprimento do seu obxecto.
- O incumprimento total ou parcial de calquera das cláusulas que nel se establecen.
- O transcurso do tempo estipulado sen que culminen as actividade acordadas.

Novena.- Publicidade do convenio

En cumprimento do disposto na Lei 4/2006, do 30 de xuño, de transparencia e boas prácticas na Administración pública galega, a Axencia Turismo de Galicia informará na súa páxina web oficial da dita subscrición cos seguintes datos básicos: identificación das partes

intervenientes, importe do financiamento, data da sinatura, finalidade e período de vixencia. A sinatura do convenio leva implícita a autorización para o tratamento necesario dos datos e a referida publicidade.

Asemade procederase a inscrición do convenio no Rexistro de Convenios, de conformidade co establecido no artigo 5 do Decreto 126/2006, do 20 de xullo, polo que se regula o Rexistro de Convenios da Xunta de Galicia.

Décima.- Vixencia

Este convenio entrará en vigor na data da súa sinatura, terá vixencia ata o 15 de outubro de 2016.

En proba da súa conformidade, as partes asinan este convenio, por duplicado exemplar e a un só efecto, no lugar e data expresados no encabezamento.

Pola Axencia de Turismo de Galicia
A directora de Turismo de Galicia

Por Ulises Project Eventos S.L.
O administrador

M^a Nava Castro Domínguez